

得心集醫案卷四

南城謝星煥映廬甫著

門人 劉紹基 汪士瑤 孫 同校

趙省庵先生

男甘霖 時若 杏園 纂輯

金谿

姜真吾先生 較定

姪甘棠 釀亭編次

衝逆門 噎膈嘔呃氣急沖咽

孫恩洪 謄稿

七情鬱結 三條

吳發明得噎食病咽喉阻塞胸膈窄緊每飯必嘔痰水帶

食而出嘔盡方安遍嘗諸藥竟無一效粒米未入者月餘
審其形氣色脈知爲痰火素盛加以七情鬱結擾動五志
之陽糾合而成斯疾疏與四七湯合四磨飲而安蓋察其
形瘦性躁色赤脈滑且舌傍雖紅而白胎涎沫如粉堆積
其中也次年復發自以前方再服不應余以四七湯除半
夏加石斛桑葉丹皮萸皮數劑復安蓋察其脈雖滑而帶
數且唇燥舌赤故取輕清之味以散上焦火鬱也越年又
發又將舊方服之病益加甚余於五磨飲中用枳榔烏藥

加白芍七氣湯中用厚樸蘇梗加入旋覆花鬱金橘紅淡
鼓山梔治之二劑而安蓋察其脈來浮滑加以饘粥胸痛
知其胃之上脘必有陳腐之氣與火交結也後因七情不
戒飲食不節藥餌不當調理不善逾年仍發自與知醫者
相商謂余之治無非此意遂將連年諸方加減湊合服之
愈服愈殆余又用蘇子芥子萊菔子巨勝子火麻仁搗漿
取汁合四磨飲服之頓安蓋察其脈轉濇而舌心燥粉堆
積加以氣壅便秘也吳問曰世云古方難以治今病謂今

病必須今方、今以今方令病、且本症本人而取效不再者、其故何哉、余曰、本症雖同、兼症則異、此正謂景因時變、情隨物遷耳、夫藥猶兵也、方猶陣也、務在識機觀變、因地制宜、相時取用、乘勢而舉、方乃有功、若不識地勢、不知時宜、敢任戰伐之權哉、吳恍然曰、若是真所謂膠柱不可鼓瑟、按圖不可索驥矣、因請立案、以爲檢方治病之鑑、

四七湯

局方亦名七氣湯
以四味治七情也

人參

官桂

半夏

甘草

薑

七氣湯 三因亦名四七湯

半夏

厚樸

茯苓

蘇葉

薑棗

四磨湯

一方人參易枳殼一方去人參加枳實木香白酒磨服名五磨飲子治暴怒卒死名曰氣厥

人參

枳殼

沉香

烏藥

等分濃磨煎三四沸溫服

吳敬倫先生年近六旬得噎食病每食胃中痛嘔痰飲上泛欲吐甚艱嘔盡稍適久投香砂六君丁寇理中等藥毫無一效計病已五閱月矣諸醫辭治肌膚削極自分必斃其嗣君姑延一診欲決逝期診得脈無緊濡且喜浮滑大

腸不結所解亦順但苦吞吐維艱咽喉如有物阻胸膈似覺不開因謂之曰此症十分可治古云上病過中下病過中皆難治今君之病原屬於上數月以來病猶在上故可治耳以四七湯合四磨飲一服而胸膈覺開再服而咽噎稍利始以米湯繼以稀粥漸以濃粥進十餘劑始得納穀如常隨以逍遙散間服六君子湯調理兩月形容精彩視素日而益加焉門人疑而問曰自古風勞蠱脹四大重症法所不治而吳翁噎病先生一視極言可治用藥不奇而

取效甚捷、何也、答曰、昔先君嘗誨余曰、人身有七門、唇曰飛門、齒曰戶門、喉間厭會曰吸門、胃之上口曰賁門、胃之下口曰幽門、大小腸之下口曰闌門、肛腸之下曰魄門、凡人納穀自飛門而入、必由魄門而出、原噎食一症、始則喉間阻塞、繼則胸膈不舒、涎食湧吐而出、推其原、多由七情氣結、或酒色陰傷、或寒熱拒隔、或虵蟲貫咽、或凝痰死血、或過飲熱酒、雖所因不一、而見症則同、以賁門上至飛門俱病矣、由是津液日涸、腸胃無資、幽闌漸窄、糞結彈丸

者勢所必至、脉或弦數勁指、世則緊瀉堅搏、無非陰枯而陽結也、至此不究所因、而不治則一以賁門下至魄門俱病矣、故善治者、必先乘其機、察其因而調其上、務期速愈爲工、倘賁門一廢、雖有靈芝、亦難續命、而况庶草乎、此千古未發之旨、獨先君悟徹病情、不以五臟六腑定安危、而以七門決生死、更分可治不可治之例、其亦神矣、今吳翁之病、喉間若塞、胸膈若閉、而脈來浮滑、大便甚快、是病尚在賁門之界、故許其可治、余乘機投以辛溫流利舒氣

降逆則陰陽自爲升降。七門運用如常。亦先君乘機速治遺意也。至吞之不入吐之不出。此七情氣結。方書所稱梅核症耳。張鷟峯先生云。噎症乃神思間病。惟內觀養者可治。

四七湯 四磨飲 二方俱見本門 前案

逍遙散 方見卷一傷寒門 陰陽易症

傅光廷令堂年踰七旬。時微發熱。躁擾呻吟。大扇搨之。或稍安。口渴飲湯。輒嘔稠痰。醫以發汗藥治之。遂時熱時

食藥物入口卽吐大便阻格又以攻下藥治之僅得
二解仍然秘塞面浮腹脹胸緊氣促心煩口苦日夜不寐
身軟難支有議下者有議補者其家惶惑無主求正於余
診其脉流利平和余曰用補者因其年老已經汗下也用
攻者因其腹脹便秘也究屬見病治病不察其因不辨其
症其因者內因外因不內外因是也其症者六淫七情之
屬是也夫其初起之際時微發熱已非外感熱甚可知身
可受扇其骨蒸內熱又可預擬兼之先病嘔吐後加汗下

之剗劑宜乎困倦神昏口淡無味而心煩口苦日夜不寐者知其肝膽相火上升也。又病纏日久表裏俱傷脈宜細數短澇今流利平和其先天之厚可知。由是推之其所以脈流利者痰也。心煩口苦者火也。胸緊嘔吐者痰也。腹脹便閉者氣也。發熱受扇者內熱也。口渴飲湯者痰逢冷則愈凝遇湯則暫開也。合觀諸證顯係內因七情之病。必因素有思慮鬱結之情。蓋思慮則火起於內。鬱結則痰聚於內。五志厥陰之火早已與痰飲結爲一家。夫火動則陽

痰聚則陰涸。乃病勢所自然。今陽氣結於上。所以嘔吐。
不。下。液衰於下。所以腹脹便秘。若誤補則陽愈亢。誤攻。
則陰愈涸。此定理也。然則治之當何如。余思病既由於七。
情鬱結。痰火內生。下秘上吐。九竅已屬不和。經曰。九竅不。
和。都屬胃病。但胃屬陽土。較治陰土不同。蓋太陰脾土喜。
剛喜燥。陽明胃土宜柔宜和。故陽明無壅補之條。太陰有。
忌下之禁。此陰土陽土最緊疆界。世醫不察者多。斯疾陰。
枯陽結。嘔吐便秘。發熱不寐。凡此皆陽明不和之本症。法。

當清胃和中。但久病陽氣亦憊。是清胃又忌苦寒滯膩。老年陰精已竭。故和中尤非。香散可施。惟有溫膽湯可用。內加烏梅一味。取其和陰斂痰。一劑嘔吐畧止。稍能納粥。大便亦通。腹脹頓減。再劑食已漸進。夜寐亦安。後以生津濟陰藥。洋參麥冬石斛菱麤之屬。頻進而痊。

溫膽湯

方見卷一傷寒門

誤治傳經

肝木尅土

銳章嘔吐拒食。時平時篤。已十載矣。今春喪子憂愁。病

曰進每食氣阻格咽翻擁而吐甚至嘔血數口肌肉枯
議勞傷噎食不治余曰非也此人全因操勞性急稍
拂意必怒怒則傷肝所以日久欠明者皆肝病也至於每
食氣阻乃肝木尅土之象此屬七情中病當以七情之藥
治之倣古四磨飲以治氣結氣結血必凝以玄胡鬱金破
宿而生新久病實亦虛以歸芍養肝而補血合之成劑氣
血交治蓋氣病必及於血血病必及於氣并囑靜養戒怒
竟以此方服至半月告余曰向者胸前覺有一塊今無之

何也、余曰、木舒而鬱散耳、服至一月、食飲倍常、形體充盛、此則揆之以理、并因其人而藥之、之一驗也、

附方

烏藥

枳榔

枳殼

木香

沉香

右四味濃磨汁各一匙冲入後藥

當歸

童便洗

白芍

各三錢

鬱金

延胡索

各一錢五分

水煎去滓和入前汁同服

痰火上攻

定遠得痰膈病發時呃逆連聲咽喉如物阻塞欲吞之而氣梗不下欲吐之而氣橫不出摩揉撫按煩惋之極醫治兩月溫胃如丁香蔻薑桂清胃如芩連硝黃絕無寸效延余診視其氣逆上而呃聲甚厲咽中閉塞兩肩高聳目瞪口張儼然脫絕之象勢甚可駭然脈來寸口洪滑上下目胞紅突辨色聆音察脈審症知爲痰火上攻肺胃其痰也火也非氣逆不能升也遂處四磨湯加海石山梔芥子瓜蒌竹瀝薑汁連投數劑俾得氣順火降痰消再以知柏地